

Dat ander kapittel.

Wo de konnink na der klage des kanynen unde der kreien sik tórnedede,
unde wat he sprak.

- 3415 Do alsus der kreien wórt
unde ók des kanynen weren gehórt,
alse se ere klage sus hadden vormelt,
Nobel de konnink wart sere vorgrelt;
he sprak in tórne: by myner truwen,
3420 de ik schuldich bin myner vruwen,
ik wil dit quade so érlík wreken,
dat men dár lange schal afspreken,
dat myn geleide unde myn gebot
sus ís tobroken. ik was én sot,
3425 dat ik dessen schalken vos
so willigen hebbe gelaten lós
unde ik syner loggen so lovede,
dármede he my so listigen schovede.
ik makede enen pelegim van em,
3430 he scholde hen to Jerusalem.
wo klouwede he my up der mouwen!
men de schult was by myner vruwen.
doch ik bin des allene nicht,
de by vruwenrade schaden kricht.
3435 late ik Reinken lenger betemen,
alle wy moten uns des schemen.
it is tomalen én slimme droch:
so was he to jár, so is he noch.
gy heren, denket darup mit vlyt,
3440 wo wy ene krygen in korter tyt!
nicht en kan he uns entgân,
wil wy dat érnstlik grypen an. —

Dat dridde kapittel.

Wo de konnink rede makede in tórne mit al den deren unde vogelen
unde wolde Reinken sôken, unde wo dit Ysegrime unde Brunen sêr
wol behagede.

- Ysegrim unde Brune, desse bede
behagede wol, wat de konnink sêde;
3445 se hopeneden noch wêrden gewroken
an Reinken, konden se it tóstoken;
men se en dorsten nicht spreken én wórt.
de konnink was so sere vorstórt
unde was sêr tórnich in al syneme sinne.
3450 int leste sprak de konniginne: